

# ያይቆኑቤ ኪኢቶ ዓይያ ካር

ሃይ ያይቆኑቤ ኪኢታ ዓሲ ናንጋንዳ ጎይሢ ዳዋ ማለሢ ዓርቄያ ማዓዛ፣ ኪኢታ ፃኣፒንቴሢያ ዬኖ ዋዶና ዓጮ ቢያይዳ ላኣሊንቴ ዓኣ ያኣሲ ዳሮሞኬ፤ ኪኢቴሎ ፃኣፒሢ ዔራቶ ኑ ማዳይዳ ፔኤሻንዳ ጎይሢና ዬሱሴ ጉሙርቃ ዓሲ ናንጋንዳ ናንጋ ፔጋዲ ዔርቴያ ማዓንዳጉዲ ጌኤሽ ዔርዛ ጎይሢ ኬኤዛኔ፤ ዬይያኣ፡- ማንቃቶና ዖርጎቹሞና ዛላ፣ ዳቢንታቴያ ዛጋኒ ጌሽሢ ዛላ፣ ዓሲኮ ኮሹሞ ዛላ፣ ቁኢሩሞ ዛላ፣ ጉሙርቁሢና ኮሽ ማዳና ዛላ፣ ዒንዲርሲኮ ኮሹሞንታ ፑርቱሞንታ ዛላ፣ ዔራቶ ዛላ፣ ዋለና ፑርቱሢ ዛላ፣ ዖቶርሙሞና ሽሌዑሞና ዛላ፣ ኮይሱሞ ጎይሢና ማሌ ዓሲዳ ዋጊሢ ዛላ፣ ዓኣ ባኣዚና ሄርሽንቴና ሆኦሊንቴሢና ዛላ፣ ዳንዳዒሢና ሽኢጸሢና ዛላ፣ ዬሱሴ ጉሙርቃ ዓሳ ዔራኒ ኮይሳ ባኣዚ ፓይዲ ፓይዲ ፃኣፒኔ።

ሃና ኪኢታ ባሽ ፔጋሲ ኬኤዛሢ ዬሱሴ ጉሙርቃ ዓሳ ዬሱሴ ጉሙርቁያ ናንጎ ማዳና ዳዋንዳጉዲኬ።

## ማፃኣፔላ ዲማ ዲማ ዓርቄ ባኮ

- ዓይያ ካር (1:1)
- ዬሱሴ ጉሙርቁሢና ዔራቶና ዛላ (1:2-8)
- ማንቃቶና ዖርጎቹሞና ዛላ (1:9-11)
- ዳቢንታቴ ዛጋኒ ጌሽሢና ሜቶና ዛላ (1:12-18)
- ዋይዚሢና ማዳይዳ ፔኤሽሢና ዛላ (1:19-27)
- ዓሲ ዲማሲሢ ኮይሱሞያ ማዔሢ ዛላ (2:1-13)
- ዬሱሴ ጉሙርቁሢና ማዳና ዛላ (2:14-26)
- ዬሱሴ ጉሙርቃ ዓሲና ዒዛኮ ዒንዲርዘ ዛላ (3:1-18)
- ዬሱሴ ጉሙርቃ ዓሲና ሃያ ዓጮ ዓሶ ዛላ (4:1—5:6)
- ዲማ ዲማ ዞሮ (5:7-20)

1 ዓጮ ቢያ ላኣሊንቴ ዳንዳ ያኣሲ ዓሶ ማዔ ታጸ ላሞያ ዜርያሞ፡- ያኣሲና ጎዳ ዬሱሴ ኪሪሰቶሴናሞ ማዳያ ማዔ ያይቆኑቤይዳፓ ዳኪንቴ ኪኢታ፤

1:1 ማቴ. 13:55፤ ማር. 6:3፤ ዳኪ. ማዳ 15:13፤ ጋላ. 1:19።

**ዲንሢ ዎዚ ኮሺዳ?**

**ጊቢ ዳንዳዲሢና ጉሙርቁሢና ሃሣ ዔራቶና ዛላ**

2 ታ ዲሾንሃ! ታ ሚሾንሃ! ዲማ ዲማ ሜታ ዲንሢ ሄሌ ዎደና ኮሺ ባኣዚ ማሂ ዛጉዋቱ።

3 ዓይጎር ጌዔቶ ዲንሢ ጉሙርቁፃ ሜቶና ዛጊንታ ዎደና ጊቢ ዳንዳዲሢ ዲንሢ ዴንቃንዳ።

4 ዲንሢ ጊቢ ዳንዳዲ ደዲፃ፡ ፔቲ ባኣዚታፃ ዲንሢ ፓጩባኣንቲ ጎኔ ዓሲ ዲንሢ ማዓንዳጉዲ ማሆንጎ።

5 ዲንሢ ባኣካ ዔራቶ ፓጩ ዓሲ ዓኣቶ ጾኦሲ ሸኢቆንጎ፤ ጾኦሲ ዓዲ ዛም ዲንጋንዳ፤ ዓይጎር ጌዔቶ ዲዚ ፔቲ ባኣዚታዎ ላኣጉዋፃ ቢያሢ ጉሹዋና ዲዲንጋንኩ።

6 ጋዓንቲ ዓሲ ፔቲታፃ ዓልቲዎፃ ጉሙርቁሢና ሸኢቆንጎ፤ «ማዓንዳ?» ጌዲ ዓልታ ዓሲ ዠባሬና ሂዲንታፃና ዓጊፃ ባዘ ዋኣፃ ጉዴያኩ።

7 ዬያጉዴ ዓሲ ጎዳይዳፓ ፔቲ ባኣዚታፃ ዴንቃንዳ ዓዲ ማሎፓ።

8 ዓይጎር ጌዔቶ ዲዛኮ ላምፃ ማሊሢ ዓኣሢርና ሃሣ ዲዚ ዔቁ ጎይፃይዳ ሴካ ሃንጋ ጋዓሢርኩ።

**ማንቆ ዓሲና ፆርጎቺ ዓሲናኮ ዓኣ ዎዛ**

9 ዬሱሴ ጉሙርቁ ጎናሲ ዔኩ ማንቆ ማዔ፡ ሂርኩ ዓሢ ጾኦሲ ዲዛ ዴጊዳንዳሢር ዎዛዶንጎ።

10 ሃሣ ጾኦሲ ጉሙርቁ ፆርጎጩ ማዔ ፑኡፖ ዓሢ ዲዛኮ ናንጎ ጾኦሲ ሂርኪዴቶ ዎዎዛዶንጎ፤ ዓይጎር ጌዔቶ ዓሲኮ ቆሎ ሳፃይዳ ዓኣ ቡኒጉዲ ዲኣና።

11 ዓባ ፃይዲ ኬሰካፃ ማኣቶ ሜልዛ፤ ቡናኣ ዲኣና፤ ሃሣ ሚዛጰማኣ ባባይቃ። ዬያጉዲ ፆርጎቺ ዓሲ ፔኤኮ ቆሎ ዛሎይዳ ሌሊ ጳሽኪ ጉሪ ዓታ።

**ዓሲዳ ሄላ ሜቶ**

12 ፔ ጊዳ ሙኩ ሜቶ ጊቢ ዳንዳዲ ደዳ ዓሲ ዓንጂንቲያኩ፤ ዓይጎር ጌዔቶ ጾኦሲ ጫኣቁም ጌሌ ጎይፃና ዲዛ ናሽካ ዓሲም ዲንጋንዳ ኮኩ ናንጎ ዲ ዴንቃንዳ።

13 ዓሲ ሜቶይዳ ጌላ ዎደና፡- «ጾኦሲ ታና ዳቢሻኒ ሜቶ ዲንጌ።» ጎፃፓ፤ ዓይጎር ጌዔቶ ፑርታ ሜቶ ጾኦሲ ዓሲም ዓሲ ዳቢሻኒ ዲንጉዋሴ፤ ሃሣ ዲዚ ፆናኣ ዳቢሻኒ ፑርታ ሜቶ ዲንጉዋሴ፤

---

1:11 ዓ.ሲ. 40:6-7።

14 ጋዓንቴ ፔቴ ፔቴሣ ሜቶ ዔኪ ዳቢንታሣ ፔኤኮ ፑርቶ ሱኡኮ ጊንፆ ዓኣዲ ጌሺንቲሣናኬ።

15 ዬካፓ ፑርቶ ሱኡካ ጎጳዲ ጎሜ ሾዓኔ፤ ጎሜያ ዲጨ ዑጌሰካፓ ሃይቢ ሾዓኔ።

16 ታኣኒ ዒንሣ ናሽካ፥ ታኣኮ ዒሾንሦ! ሚሾንሦ! ጌሺንቲፖቴ፤

17 ኮሺ ማዔ ዒንጊሣንታ ጉቤ ማዔ ዓንጅዋ ቢያ ጾኦሲዳፓኬ፤ ዬይያ ሙካሣ ሸቢጉዲ ቤዛፓ ሸኢኪ ላኣሚንቱዋያ፥ ሃሣ ፖጾኮ ቢያ ዓዶ ማዔ ጾኦካሣዳፓኬ።

18 ጾኦሲ ፔኤኮ ማዠንቶ ቢያሣኮ ኑኡኒ ቤርቲ ማዓንዳጉዲ ፔ ማላሣዳፓ ጎኑሞ ቃኣሎና ኑና ሾዓኔ።

**ዋይዜ ባኮ ማዶይዳ ፔኤሺሣ**

19 ታኣኒ ዒንሣ ናሽካ፥ ታኣኮ ዒሾንሦ! ሚሾንሦ! ሃይማ ዋሊፖቴ፤ ዓሲ ቢያ ዔኤቢ ዋይዛኒ ሩኡራያ፥ ኬኤዛኒና ዳጋዲ ጎሪንታኒ ታሣያ ማጾንጎ።

20 ዓይጎር ጌዔቶ ዓሲኮ ዳጋዲ ጎሪንቲ ጾኦሲኮ ዪሉማ ዓሲ ሸምፖይዳ ኩሙሣ ማዓንዳጉዲ ማሁዋሴ።

21 ዬያር ዒኣሳ ባኣዚንታ ዲቦ ፑርቱሞዋ ቢያ ዒንሣዳፓ ሸኢሺ ዒንሣኮ ዒኖይዳ ዜርቁንቲ ዒንሣ ዳቁሻኒ ዳንዳዓ ጾኦሲ ቃኣሎ ሸሌዑሞና ዔኩዋቴ።

22 ቃኣሎ ማዶይዳ ፔኤሻያ ማዑዋቴ፤ ጋዓንቴ ዒንሣ ዒንሣ ቶኣኮ ዒንሣረ ጌሺ ጌሺ ዋይዛ ዓሲ ሌሊ ማዒፖቴ።

23 ቃኣሎ ዋይዛፆ ማዶይዳ ፔኤሹዋ ዓሲ፥ ፔኤኮ ዓኣፖ ካር ሌማሌኤሾና ዛጋ ዓሲ ጉዴያኬ፤

24 ዓይጎር ጌዔቶ ዬይ ዓሣ ፔኤኮ ዓኣፖ ካር ሌማሌኤሾና ዛጌሰካፓ ዓኣዳኔ፤ ጋዓንቴ ዳካ ጌዔሰካፓ ዋኣዴታቴያ ዒ ፔና ዔሩዋሴ።

25 ጋዓንቴ ጎሜ ዓይላቶይዳፓ ጉቤና ዒዛ ኬሳ ዋጎ ዛጊ ዬያና ደዳያ፥ ዬያ ዋይዛፆ ዋሉዋያ፥ ሃሣ ማዶይዳ ፔኤሻ ዓሣ ዬይ ፔ ማዶና ዓንጅንቱያ ማዓንዳኔ።

26 ዒንዲርዘ ፔኤሲ ቃዙዋፆ «ታ ጾኦሲ ካኣሽካኔ» ጋዓ ዓሲ ፔና ጌሻኔ፤ ዒዛኮ ካኣዣኣ ጉሪኬ።

27 ጾኦሲ፥ ዳዳሣ ቤርቶይዳ ፑርታ ባኣዚ ባኣያ ጌኤሺ ማዔ ጉሙርቁፆ ካኣዣ፡- «ዜኤር ናኣቶንታ ሃሣ ዬያጉዲ ዜኤርይንዶ ማዔ ላኣሎንታኮ ዓኣ ሜቶ ማኣዲሣና ፔ ቶኣኮዋ ሳፆይዳ ዒኣሳ ባኮይዳፓ ካፒሣኬ።»

# 2

## ዓሲ ዲማሲ ዛጋንዳያ ኮይሱዎያ ማዒያ

1 ታ ዒሾንህ! ታ ሚሾንህ! ቦንቸንቴ ኑ ጎዳሢ ዩሱስ ከሪስቶስ ዒንሢ ጉሙርቃያ ማዕሢሮ ፔቴሢ ባጋሢዳፓ ባሻያ ማሂ ዛጊ ዲሙሞ ሳዛ ጌሢፖቴ።

2 ጎያንቴ ላምዖ ዓሲ ዒንሢ ቡኪንቴ ቤዘ ሙኬኔ ኑ ጎያም፤ ፔቴ ዓሢ ኬኤሎይዳ ዋርቄ ዠኢሮ ዓኣሢ ሃህ ሚዛጲ ማኣያ ማይንቴ ያርጎቹ ዓሲ፣ ባጋሢ ቱርጫዲ ኪንቄ ማኣያ ማይንቴያ ማንቆ ዓሲ ማዕዔቶ።

3 ዒንሢ ሚዛጶ ዓፒሎ ማይንቴ ዓሢ ቦንቸ፡- «ሃሮ ኮዦ ቤዘሎይዳ ዴዔ» ጌዒጋፓ ማንቆ ዓሢም ጋዓንቴ፡- «ኔኤኒ ያኣሶ ዔቄ ጋዓንዳኔ፤ ሃንጎ ዒንሢ ዒዛ ሃይካ ሙኪ ቶኮ ዴማ ዴዔ» ጋዓንዳኔ።

4 ዩያይዲያና ዒንሢ ባኣኮይዳ ዒንሢ ፔቴሢ ሂርኪዲ ባጋሢ ባሼ ማሂ ዲሙሞ ሳዛ ጌሢያ፣ ሃህ ቸርቱሞና ዓሲዳ ዋጋያ ማዒባኣዳ?

5 ታኣኒ ዒንሢ ናሽካ፣ ታኣኮ ዒሾንህ! ሚሾንህ! ዋይዙዋቴ፤ ያኣሲ ዒዛ ጉሙርቄ ጎናሲ ዔኪያና ዔያታ ያርጎቹ ማዓንዳጉዲና ዒዛ ናሽካ ዓሶም ሃጊ ማዓንዳ ዋዛ ማሂ ዒንጌ ካኣቱሞ ዔያታ ዳካላንዳጉዲ ሃያ ሳይይዳ ዓኣ ማንቆ ዓሶ ዒዚ ዶኦሪባኣዳ?

6 ዒንሢ ጋዓንቴ ማንቆ ዓሶ ቦሃኔ፤ ዒንሢ ሜታጎ ዓሶና ሃህ ዋጎ ቤዘ ዒንሢ ዔኪ ዔኪ ዓኣዳ ዓጎ ያርጎጮ ዓሶቱዋዳ?

7 ዒንሢ ዛሎና ዔኤሊንታ ቦንቸንቴ ሱንያ ዒንሢኮ ጫሽካሢ ዔያቶቱዋዳ?

8 ጌኤዦ ማፃኣፖይዳ፡- «ዓሲ ዓዳ ኔና ማሂ ናሽኬ» ጌይንቴ ፃኣፒንቴ ያኣሲኮ ቦንቸንቴ ዋጎ ዒንሢ ኩንሣያ ማዕዔቶ ኮሺ ዒንሢ ማዳኔ።

9 ዓሶ ባኣካ ዒንሢ ዲማሲሢ ጌሢቶ ጋዓንቴ ጎሜ ዒንሢ ማዳኔ፤ ዋጎኮ ዒንሢ ዑሣ ዓኣዲያና ዋጋ ፔ ቶኣኪና ዒንሢም ዳቢንቶ ዳዋንዳኔ።

10 ዓሲ ያኣሲ ዓይሢያ ቢያሢዳፓ ፔቴ ዳባዖ፣ ሃንጎ ዓቲሢ ቢያ ኩንሣያታቶዋ ቢያሢ ዒዚ ዳቤያ ማዓንዳኔ።

11 «ማቾ ሃህ ዓሲ ማዒባኣ ዓሲና ላሂፖ» ጌዔ ጎዳሢ ዩያጉዲ ሃህ «ዓሲ ዋዲፖ» ጌዔኔ፤ ኔኤኒ ማቾ ሃህ ዓሲ ማዒባኣ ዓሲና ላሂባኣያ ማዕዔቶዋ ዓሲ ኔ ዋዴቴ ዋጎ ኔ ዳቤኔ።

2:8 ለዊ. ዓኬ 19:18። 2:11 ኬሲ. ማፃ 20:13-14፤ ላሚ. ዋማ 5:17-18።

12 ዲንሢ ጌስታና ሃሣ ማዳና ዋጋ ጎሜ ዓይላቶይዳፓ ጉቤ ኬሴ ዓሲጉዲ ማዑቀቴ።

13 ዓይጎር ጌዔቶ ጾኦሲኮ ዋጋ ዓቶም ጎውቀ ዓሲም ፔኤር ዓቶም ጎውቀሴ፤ ያዲ ማዔቶቀ ዓቶም ጌይሢ ዋጌ ባባሻ።

**ጉሙርቂሢና ማዶና ዛላ**

14 ታ ዲሾንሦ! ታ ሚሾንሦ! ዓሲ፡- «ዩሱሴ ታ ጉሙርቃኔ» ጋዓ፡ ጉሙርቂዩ ኮሺ ማዶና ፔጋሲባኦቶ ዒዛ ዓይጎ ማኦዳንዳይ? ጉሙርቂዩ ዒዛኮ ዒዛ ዳቂሻኒ ዳንዳዓ?

15 ኮኦኪንሢና ማኦ ዓሲ ዲንሢና ማኦ ባኦ ዲንሢና ማኦ ጌርሲንሢ ሃሣ ጌርንሢ ማዓ ዓሲ ዲንሢኮ ዓኦንቴ።

16 ዲንሢ ዔያቶ ናንጎም ኮይሳ ባኮ ዲንጉዋፆ ጉሪ፡- «ኮሺ ዓኦዳቀቴ! ዲንሢም ጋይዶንጎ! ሙዒ ሚሽኩቀቴ!» ጌዔያታቶ ዔያቶ ዓይጎ ማኦዳንዳይ?

17 ዩያር ኮሺ ማዶይዳፓ ዲማዴ ዩሱሴ ጉሙርቂሢ ፔ ቶኦኪና ሃይቂያኬ።

18 ጋዓንቴ፡- «ኔኤኒ ታ ዩሱሴ ጉሙርቃኔ» ጌዒ ጾቶርቃያታቶ፡ ታ ኮሺ ማዶ ማዶያኬ» ጋዓ ዓሲ ዓኦቶ፡ «ታኦኒ ዒዛም ኔኤኮ ዩሱሴ ጉሙርቂዩ ኔ ማዶይዳፓ ዲማሲ ታና ቤኤዜ፤ ታኦኒያ ታ ማዶና ዩሱሴ ጉሙርቂዩ ታኦኒ ኔና ቤኤዛንዳኔ» ጋዓንዳ።

19 ኔኤኒ፡- «ፔቴ ጾኦሲ ዓኦኔ ጌዒ ጉሙርቃኔ» ዩይ ኮሺኬ፤ ጋዓንቴ ጉሙርቂዩ ፑርቶ ዓያናኦ ጉጉሙርቃኔ፤ ሃሣ ዒጊጨያ ጎጎጋይቃ።

20 ኔኤኒ ሃይ ዔኤያሢ! ማዶይዳፓ ዲማዴ ጉሙርቂሢ ዓኦፒ ባኦያ \* ማዔሢ ኔ ዛጋ?

21 ኦዳሢ ዓብራሃሜ ፔ ናኦዚ ዩሳኦቂ ዲንጎ ባኮ ሺኢሺ ካኦሽኮ ቤዘይዳ ጾኦሲም ዲንጎ ባኦዚ ማዓንዳጉዲ ሺኢሺ ዋዶና፡ ማዶና ዪሊባኦዳ?

22 ዩይ ጉሙርቂዩ ማዶና ዋላ ማዔሢና ጉሙርቂዩኦ ማዶና ጎናዴሢ ኔ ዛጋ?

23 ጌኤዢ ማዓኦፖይዳ፡- «ዓብራሃሜ ጾኦሲ ጉሙርቂኔ፤ ጾኦሲያ ዒዛ ፔ ዓሲ ማሄኔ» ጌይንቴ ቃኦላ ኩሜኔ፤ ዩያይዲያና ዓብራሃሜ ጾኦሲኮ ላጌ ጌይንቴ።

24 ዓኦሪ ዓሲ ዪላሢ ጉሙርቂሢና ሌሊቱዋንቴ ማዶና ዋላ ማዔሢ ኔ ዛጋ።

---

\* **2:20** ዓኦፒ ባኦያ፡ ጋዓዛ ፔቴ ፔቴ ቡሊያ ማዓኦፓ «ሃይቂያ» ጋዓ። **2:21** ማኢ. ማዓ 22:1-14። **2:23** ማኢ. ማዓ 15:6፤ 2ጾኦሲ. ዓሃኬ 20:7፤ ዓሲ. 41:8።

25 ዓሲ ባኣያ ዘኣዛ ኮኣማ፣ ሬዓባ ጌይንታ ላኣሌላ ዒሰራዔኤሌኮ ከኢቶ ዓሶ ፔ ማኣራ ዔኪ ሾኦቲንሢያና ሃሣ ገንሣ ማሌ ጎይሢና ፑኒንቲ ዔያታ ቶሊ ዴንዳንዳጉዲ ማሂያና ፔ ማዶና ዒሊባኣዓዳ?

26 ሹሞፖይዳፓ ዲማዴ ዓሽኪ ሃይቄያታሢጉዲ ማዶይዳፓ ዲማዴ ጉሙርቁሢ ያዴ ሃይቄያኬ።

### 3

#### ዒንዲርሲ ፑርታ ባኣዚፓ ካፒሢ ዛላ

1 ታ ዒሾንሃ! ታ ሚሾንሃ! ኦኡኒ ዔርዘ ዓሶ ማዔ ዓሳ ዑሣ ዓኣዴ ማቶ ዔካንዳያ ማዔሢ ዒንሢ ዔራኔ፤ ዩያሮ ዒንሢዳፓ ሚርጌሢ ዔርዘ ዓሶ ማፖፓ።

2 ዓይጎሮ ጌዔቶ ኦኡኒ ቢያሢ ሚርጌና ዳቢንታኔ፤ ፔ ጌሰታ ጌኤዘና ዳቢንቱዋ ዓሢ ዩይ ፔና ካፓኒ ዳንዳዓ ጎኔ ዓሲኬ።

3 ፓራሢ ኦሞ ዓይሢንታንዳጉዲ ዳንጎይዳ ኦኡኒ ቢፃላ ጌልዛኔ፤ ዩያይዲ ኦ ኮዔ ቤሲ ፓራሢ ዔኪ ዓኣዳኔ።

4 ሃሣ ዋኣዖ ካኣሚላ ዋዚ ዴኤፒ ማዔያ ሃሣ ዴኤፒ ዠባሬና ሃዒንቲ ዓኣዳያ ማዔቶዋ፣ ዋኣዖ ካኣሚሎ ዒሻ ዓሢ ዓልዔቱዋ ባኣዚና ዒዚ ኮዔ ቤሲ ዔኪ ዓኣዳኔ።

5 ዩያጉዲ ዒንዲርሲ ዑያይዳፓ ዳካታዖ ሚርጌ ዴኤፒ ባኣዚና ዖቶርቃኔ፤ ፑኤፒ ካይዚ ሚቲንታሢ ዳካ ታሚናኬ።

6 ዩኖ ጎይዖ ዒንዲርሲያ ታሚኬ፤ ዒንዲርሲ ኦ ዑያ ባኣኮይዳ ዴዳ ፑርታ ዓጨኬ፤ ኦኡኮ ዑያ ዓኣ ዓሽኮዋ ቢያ ዒኣሳኔ፤ ናንጎ ቢያይዳ ኦኡኮ ዓኣ ጳዠና ዑያና ቢያ ታሚዳ ሚቻኔ፤ ፔኤርዋ ባይቁዋ ጋኣናኣሜ ታሞይዳ ሚቲንታንዳኔ።

7 ጎያይዳ ዓኣ ካፖንታ ቦዖ ዳኮንታ ዴኤፖንታ ሃሣ ባዘይዳ ዓኣ ማዠንታ ቢያ ዓሲና ዓርቁ ቆሊንታኒ ዳንዳዓኔ፤ ዓሲያ ዔያቶ ቆላኔ።

8 ጋዓንቲ ዒንዲርሲ ዓርቁ ቆላኒ ዳንዳዓ ዓሲ ፔቲታዖ ባኣሴ፤ ዒዛ ጌዳ ዓሲ ዋዳ ባኣዚ ኩሜያ፣ ሃሣ ሃውሺሢያ ባኣ ፑርታ ባኣዚኬ።

9 ዒዛ ዒንዲርዜሎና ኦ ጎዳሢና ኦ ዓዳሢና ኦ ዓንጃኔ፤ ሃሣ ዒዘና ዖኣሲ ማሎና ማዠንቲ ዓሶዋ ኦ ጋዳንቃኔ።

10 ፔቲ ዳንጋይዳፓ ዓንጃና ጋዳማና ኬሰካኔ፤ ታ ዒሾንሃ! ታ ሚሾንሃ! ዩይ ያዲ ማዓኒ ኮይሱዋሴ።

11 ፔቲ ዋኣሢ ዓልቃ ቤሰካፓ ኮሺ ዋኣሢና ፑርታ ዋኣሢና ዓልቃኒ ዳንዳዓ?

2:25 ዓ.ያ. 2:1-21። 3:9 ማዠ. ማፃ 1:26።

12 ታ ዲሾንህ! ታ ሚሾንህ! ቤሌሴ ሚፃ ዛይቶ ሪሚቶ  
ዓኣፖ ዓኣፓኒ ዳንዳዓ? ገንሣ ሃሣ ወይኔ ቤሌሴ ዓኣፖ ዓኣፓኒ  
ዳንዳዓ? ዬያጉዲ ፑርታ ዋኣሢ ዓልቃ ቤሰካፓ ኮሺ ዋኣሢ ጴዳኒ  
ዳንዳዑብሴ።

**ጫሪንቺ ዔራቶና ሳዓ ዔራቶና**

13 ዒንሢ ሳኣኮይዳ ዔራ ማዔያና ጳቂሃያ ማዔ ዓሲ ያናዳይ?  
ፔኤኮ ማዳ ዔራቶና ማዔ ኮሺ ናንገና ፔጋሲ ዳዎንጎ።

14 ጋዓንቴ ፑርታ ቁኢሩሞና ፔና ናሽኪሢና ዒንሢኮ ዒኖ ገዳ  
ዓኣቶ ያቶርቁፖቴ፤ ጎኔ ባኣዚያ «ዔራብሴ» ጌይፖቴ።

15 ዓይጎር ጌዔቶ ዬኖጉዴ ዔራታ ጴዳሢ ዓጮይዳፓ፣ ዓሲዳፓ  
ሃሣ ፃላሄይዳፓ ማዓንዳኣፓዓቴሞ ያኦሲዳፓቴብሴ።

16 ቁኢሩሞና ፔና ናሽኪሢና ዓኣ ቤሲዳ፣ ዣሎና ፑርታ ማዳና ቢያ  
ዓኣያ ማዓኔ።

17 ጋዓንቴ ያኦሲዳፓ ጴዳ ዔራታ ቤርታሳዎ ጌኤሺኬ፤ ሄሊሳዎ  
ኮሹሞ ናሽካያ፣ ገቢ ዳንዳዓያ፣ ዓይሢንታያ፣ ዓቶሞ ጋዓያ፣ ቃራ  
ዓኣፕ ዓኣፓያ፣ ዓሲ ዲማሲሢና ዔራያ ፔና ማሊሲሢና ባኣያኬ።

18 ኮሺ ናሽካ ዓሳ ኮሹሞ ዜርቃዎ ሂሉሞ ዓኣፕ ዳንቃኔ።

**4**

**ያኦሲሞ ቆሊንቲሢ**

1 ዒንሢ ሳኣኮይዳ ዓኣ ያሎና ዑርና ዓንካፓ ሙኬያዳይ? ዒንሢ  
ዒኖይዳ ያልታ ዒንሢ ሱኡኮይዳፓ ዔቁያቴሞዳ?

2 ዒንሢ ኮዓ ባኮ ዴንቁፃ ባሻዛ ዒንሢ ዎላ ያልታኔ፤ ሚርጌና  
ሱኡካዲ ዴንቆ ባሻዛ ዒንሢ ዎላ ዣላኔ፤ ሃሣ ዎላ ማርማኔ። ዒንሢ  
ሺኢጲሢ ሺኢቁዎያ ማዔሢሮ ዒንሢ ኮዓ ባኮ ዴንቁብሴ።

3 ዒንሢ ሺኢቁቶሞ ሺኢጲያኮ ማሃዎ ዒንሢ ዴንቁዎኣሢ ዒንሢ  
ሺኢቁ ባኮ ዒንሢ ዎዛሲሢዳ ፔኤሻኒ ፑርታ ማሊሢና ሺኢቃሢሮኬ።

4 ዒንሢ ሃይ ጉሙርቁፃ ባኣ ዓሳ! ዓጮ ናሽካሢ ያኦሲኮ  
ሞርኬታሢ ዒንሢ ዔራሞዳ? ዬያሮ ዓጮ ናሽካሢ ቢያ ያኦሲኮ  
ሞርኬ ማዓኔ።

5 ሃሣ ገንሣ ጌኤዢ ማፃኣፖይዳ፡- «ያኦሲ ዒንሢኮ ዒኖ ጋሮይዳ  
ጌሢ ዓያና ዒዛሞ ሌሊ ኑ ማዓንዳጉዲ ሚርጌና ኮዓኔ» ጌይንቴሢ  
ጉሪዳ?

6 ጌኤዡ ማፃኣፖይዳ፡- «ጾኦሲ ጾቶርቃ ዓሶ ዒፃኔ፤ ሸሌዔ ኮሺ ማዔ ዓሶም ጋዓንቴ ኮሹሞ ዒንጊፆ ዒንጋኔ» ጋዓሢሮ፣ ጾኦሲ ዒንጋ ኮሹሞ ዒንጊፆ ቢያፓ ባሽክ።

7 ዬያሮ ጾኦሲም ዓይሢንቴ ዋርቁዋቴ፤ ፃላሄ ጋዓንቴ ዒፃ ማኩሞቴ፤ ዒንሢዳፓኣ ዒዚ ሃካንዳኔ።

8 ጾኦሲ ባንሢ ዑኩሞቴ፣ ጾኦሲያ ዒንሢ ባንሢ ዑካንዳኔ፤ ዒንሢ ጎሞ ዓሳ! ዒንሢኮ ኩጮ ማሰኪ ጌኤሹሞቴ፤ ዒንሢ ሴካ ሃንጋ ጋዓ ዓሳ! ዒኖ ዒንሢኮ ፒዚሱሞቴ።

9 ሃሣ ዒኖፓ ጎኔና ማሊ ሜታዲሞቴ፤ ጾዩሞቴ፤ ሚኢጫ ዒንሢኮ ዩኤፒ ባንሢ፣ ዋዛ ዒንሢኮ ጾዩሢ ባንሢ ላኦሚንቶንጎ።

10 ጎዳሢ ቤርቶይዳ ዒንሢ ቶኦኮ ሄርኪዲሞቴ፤ ዒዚያ ዒንሢ ዴጊዳንዳኔ።

**ዓሲዳ ኮይሱሞ ጎይሢና ዋጊሢ ዛላ**

11 ታ ዒሾንሦ! ታ ሚሾንሦ! ሴካና ሃንጋና ዋሊ ደንኪፖቴ፤ ዓሲ ደንካ ዓሲ ሃሣ ዓሲዳ ኮይሱሞ ጎይሢና ዋጋ ዓሲ ዋጎ ደንካኔ፤ ዋጎይዳኣ ዋጋኔ፤ ዋጎይዳ ኔኤኒ ዋጋያ ማዔቶ፣ ዋጌ ኔ ዋጋያ ማዓንዳኣፓዓቴም ዋጌ ኔ ኩኩንሣያቴሞ።

12 ዋጎ ዒንጋሢና ዋጋሢ ፔቴ ጾኦዛሢ ሌሊኬ፤ ዳቁሻኒያ ባይዛኒያ ዳንዳዓሢ ዒዛ ሌሊኬ፤ ሂዳያ ዓሲዳ ኮይሱሞ ጎይሢና ዋጋሢ ኔ ጾናዳይ?

**ዓኣ ባኣዚና ሄርሺንቴ ዛላ**

13 ዒንሢ፡- «ሃኖታቴያ ዚሮ ማሌ ዓጪ ኑ ዓኣዲ ዒኣካ ፔቴ ሌዔ ዴዓንዳኔ፤ ኮርሚያ ዑሣ ዓኣዴ ሚኢሹ ዴንቃንዳኔ» ጋዓ ዓሳ ዒንሢ ኮሺ ዋይዙሞቴ።

14 ዓይጎሮ ጌዔቶ ዚሮ ማዓንዳ ባኮ ዒንሢ ዔሩሞ፤ ዒንሢኮ ሸምፓሢ ፔቴና ጴዳያ ባይቃ ሱኡሌፕዴያክ።

15 ባሽ ዒንሢ ጋዓንዳያ ኮይሳሢ፡- «ጾኦሲ ጌዔቶ፣ ሃሣ ሸምፓሢ ኑኡኮ ዓኣያ ማዔቶ ሃያንታ ዩያንታ ኑ ማዳንዳኔ» ጌይሢክ።

16 ዒንሢ ጋዓንቴ ዬያ ጎጾንደሢ ሃሺ ዒንሢኮ ዓኣ ባኮና ሄርሺንታኔ፤ ዬያፕዴ ሄርሺንታ ቢያ ፑርታክ።

17 ዓካሪ ኮሺ ባኣዚ ማዲሢ ዔራያታያ ማዲሞ ዓሢኮ፣ ማዲሞ ሃሺፃ ጎሜ ማዓኔ።

---

4:6 ኮኣኪ. 3:34። 4:14 ኮኣኪ. 27:1።



# 5

## ያርጎጮ ዓሶም ላቲ ኬኤዛና ባኣዚ

1 ሃሣ ዒንሢ ያርጎጮ ዓሳ ሃኒ ዬዒ ዋይዙዋቲ፤ ፑርታ ሜታ ዒንሢዳ ሄላንዳሢሮ ዒላቲ ዒላቲ ዬኤኩዋቲ።

2 ዒንሢኮ ቆላ ቢያ ዎዒ ፑርቲኔ፤ ዓፒሎዋ ዒንሢኮ ቁንቁና ሙዔኔ።

3 ዒንሢኮ ዓኣ ዎርቆና ቢሮና ሳልፔኔ፤ ዬይ ሳልፒፃ ዒንሢም ማርካ ማዓንዳኔ። ሃሣ ዒንሢኮ ዓሽኮ ዓዳ ታሚጉዲ ሙዓንዳኔ፤ ጋፒንፆ ኬሎም ዬያ ዲቦ ቆሎ ዒንሢ ኩኩሴኔ።

4 ያዲ ማዓዛ ሃሣ ጎኩይዳ ዒንሢም ማኣሎ ቡሪ ፔኤቄ ዓሶም ኩይሳ ባኮ ዒንሢ ጨገባኣሢሮ ሃይሾ ዒንሢ ዔያታ ቆፂ ዒላታ ዒላቶ ዔያቶኮ ቢያ ባኮ ዎይሣ ጎዳሢ ዋይዘኔ።

5 ሳይይዳ ኮሺ፤ ሃሣ ሚርጌና ዎዛሳ ናንጊ ዒንሢ ናንጊፆና ዑፆ ዒንሢሲ ዒንሢ ዓዳ ሹኪንታኒ ገኣጌ ቡዋጉዲ ማሊሴኔ።

6 ጌኤዣሢ ዒንሢ ሉኡዙዋና ደቤያ ማሃ፤ ዎዲያ ዒንሢ ዒዛ ዎዴኔ፤ ጋዓንቴ ዒንሢ ዒዚ ዒዲ ማኩዋሴ።

## ሜቶይዳ ገቢ ዳንዳዒሢ

7 ታ ዒሾንሃ! ታ ሚሾንሃ! ዓካሪ ጎዳሢኮ ሙኮ ገቢ ካፑዋቲ፤ ጎሽካ ዓሲ ሌፆ ዒሮና ሲሎ ዒሮና ዴንቃንዳያ ሄላንዳኣና ገቢ ቃራ ዓኣፒ ሳዓፓ ዴንቃኒ ካፓኔ፤

8 ዒንሢያ ዬያጉዲ ገቡዋቲ፤ ጎዳኮ ሙኮ ዎዳ ዑኬሢሮ ዎዛና ደዲዋቲ።

9 ታ ዒሾንሃ! ታ ሚሾንሃ! ዒንሢ ገደይዳ ዎጊንቱዋጉዲ ሴካና ሃንጋና ዎላ ማርሚፖቲ፤ ሃይሾ ዎጋሢ ሙካንዳ ዎዳ ሄሌኔ።

10 ታ ዒሾንሃ! ታ ሚሾንሃ! ጎዳሢ ሱንፆና ያኣሲ ማሊፆ ኬኤዛ ዓሳ ሜቶ ገቢ ዔኪፆና ኩኣኪንሢ ዒንሢም ማዔያታሢ ዔራዋቲ።

11 ሃሢ ገቢ ደዴ ዓሶ «ዓንጃንቲያኩ» ኑ ጋዔኔ፤ ዒዮቤ ጎፆሢ ዎዲ ገቤያታቲያ ዒንሢ ዋይዘኔ። ገንሣ ጋፒንፆይዳ ያኣሲ ዒዛም ማዴ ኮኩ ባኮዋ ዒንሢ ዛጌኔ፤ ዬያይዲፆና ጎዳ ማኣራያ፤ ሃሣ ሚርጌ ሚጨንታያ ማዔሢ ዒንሢ ዔሬኔ።

12 ታ ዒሾንሃ! ታ ሚሾንሃ! ቢያ ባኣዚኮ ቤርታ ጫሪንቸና ማፆም ሳዓና ሃሣ ሜሌ ዓይጎ ባኣዚናታፆ ጫኣቂፖቲ፤ ጌኤዛ ዒንሢኮ ጎኔና «ሂዮ» ማዔቶ ሂዮ ማፆንጎ፤ ሃሣ «ዔይዔ»

5:3 ማቴ. 6:19። 5:4 ላሚ. ዎማ 24:14-15። 5:11 ዒዮ. 1:21-22፤ 2:10፤ ዓይኑ. 103:8።

ማዕድን ጎኔና ዕይዔ ማዖንጎ፤ ያዲ ማዒባኦቶ ጋባንቴ ዒንሢዳ ዋጊንታንዳኔ።

13 ዒንሢ ባኦኮይዳ ማታ ሄሌ ዓሲ ዓኦቶ ሺኢቆንጎ፤ ሃሃ ዋዛዳ ዓሲ ዓኦቶ ዖኦሲ ጋላቲ ጋላቲ ዓይናድንጎ።

14 ዬያጉዲ ዒንሢ ባኦኮይዳ ሃርጊንቴ ዓሲ ዓኦቶ ሺኢጲያ ማኦር ጨዋ ፔ ባንሢ ዔኤሎንጎ፤ ዔያታ ሙካዖ ሃርጊንቴ ዓሢ ጎዳ ሱንዖና ዛይቶ ቲዠ ቲሽኪ ዒዛም ሺኢቆንጎ።

15 ዬያጉዴ ጉሙርቁሢዳ ዶዲ ዔቁ ሺኢቆ ሺኢጲሢ ሃርጌ ዓሢ ዳቁሻኔ፤ ጎዳሢያ ዒዛ ሃርጎይዳፓ ፖዒሳንዳኔ፤ ሃሃ ዬይ ዓሢ ማዳ ጎሜ ዓኦቶዋ ዓቶም ጌይንታኔ።

16 ዬያር ዒንሢ ሃርጎፓ ፖዒኒ ዒንሢኮ ጎሞ ሴካና ሃንጋና ዋለም ቡኡዲንቴዋቴ፤ ሃሃ ፔቴሢ ባጋሢም ሺኢቆንጎ፤ ጌኤሺ ዓሲ ሺኢጲሢኮ ማርጌ ባኦዚ ማዳ፣ ዴኤፒ ዋልቁ ዓኦኔ።

17 ዔኤሊያሴ ጎዖሢ ኑጉዴያ ዓሲታዖ፣ ዒርዚ ሳዖይዳ ዋርቁዋጉዲ ሺኢቁ ዋዶና ሃይሃ ሌዔና ላሆ ዓጊኒና ፔቴታዖ ዒርዚ ዋርቁባኦ።

18 ሃሃ ጊንሣ ዒዚ ሺኢቁ ዋዶና ጫሪንጫፓ ዒርዚ ዋርቁኔ፤ ሳዓ ጊንሣ ሃኦኮ ካሢኔ።

19 ታ ዒሾንሦ! ታ ሚሾንሦ! ዒንሢዳፓ ፔቴ ዓሲ ጎኑም ጎይፃፓ ከሰከያ ማዕም ባጋሢ ዬያ ዓሢ ጎኑም ጎይፃ ባንሢ ማሄቶ።

20 ጎሞ ዓሢ ዳቢንቴ ጎይፃፓ ማሃሢ፣ ጎሞ ዓሢኮ ሽምፖ ሃይቢዳፓ ዳቁሻያ ማዒፃና ሃሃ ዬያ ዓሢም ማርጌ ጎሜኮ ዓቶም ጌዒሢ ዴንቁሳያ ማዕሢ ዔርጎ።

---

5:12 ማቴ. 5:34-37። 5:14 ማር. 6:13። 5:17 1ካኦቶ. ማ 17:1፤ 18:1።  
5:18 1ካኦቶ. ማ 18:42-45። 5:20 ኮኦኪ. 10:12፤ 1ጳዲ. 4:8።

**ጌኤዢ ማጻሕፍት**  
**The Holy Bible in the Maale language of Ethiopia,**  
**using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

**ጌኤዢ ማጻሕፍት**

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 13 May 2025 from source files dated 13 May 2025

bbcfb90a-3ae3-5452-983d-6c4c02375929